

2. D. B. V.

20
LXVI.

THESES SELECTIONES

ex

PHILOSOPHICIS ET MEDICIS,

RECTORE ACADEMIÆ MAGNIFICENTISSIMO,

SERENISSIMO PRINCIPE AC DOMINO,

DN. FRIDERICO VVILHELMO,

ELECTORATVS BRANDENBVRGENSIS HEREDE &c. &c.

P R A E S I D E

DN. FRIDERICO HOFFMANNO

Medicinæ & Philosoph. Natural. P. P. Medico Electorali
Aulico, Collegii sui h. t. Decano,

Patrono ac Promotore meo estimatissimo

D. Novembr. clō Iōc Ic. horis antemeridianis

In Auditorio Majori

Eruditorum censura submittit

R. G. CLAMER.

Oldenb. Westph.

H A L A E,

Typis Johannis Jacobi Krebsii, Acad. Typogr.

V I R I S
PRÆNOBILISSIMIS, AMPLIS-
SIMIS, ATQVE CONSULTISSIMIS

DNNIS CONSULIBUS
DIEDERICO
GUNTHERO,

E T
DUNKERO,

NEC NON
SYNDICO VOSSIO,

CÆTERISQUE PATRIBUS
CONSCRIPTIS CLARISSIMIS

Hanc thesum dissertatiunculam
in memoriam sui submissè offert.

R. G. CLAMER.

THESES SELECTIO- RES EX PHILOSOPHICIS,

I.

INter innumeras logicas seu artes
ratiocinandi & cogitandi talis adhuc
desideratur, quæ regulas exhibeat
perspicuas, quibus copiosissimi in theo-
logicis moralibus physicis, medicis er-
rores commissi planissime ostendi &
detegi possint, & mens ab erroribus ul-
terius committendis se cavere discat.

2. Unica perfectio mentis nostræ
consistit in inquisitione veritatis.

3. Principium omnis veritatis & sa-
pientiæ rectissime est dubitatio, quo-
niam animum ad videndam veritatem

præparat præscindendo noxiosissima
præjudicia autoritatis philævtiæ &
præcipitantia.

4. Unicus & essentialis character
veritatis est intimus mentis consensus
atque convictio.

5. Quæcunque assertio non invenit
consensum & ad convictionem men-
tem humanam perducit, sed dubitatio-
nem relinquit, illa non cognoscitur
ut vera.

6. Mens veritatem non percipere ac
intime penetrare potest nisi per ideas.

7. Omnis itaque scientia consistit &
versatur in ideis rerum.

8. Idea nihil aliud est quam vesti-
gium rei externæ cerebro impressum.

9. Nul-

9. Nullæ dantur ideæ rerum menti connatæ, nihilominus menti humanæ à natura infusa quædam vis æquabilis est verum videndi illiquè assentiendi, & est portio relictæ imaginis divinæ qua homo distinguitur à bestia.

10. Si homo agit contra internam convictionem veri & iusti agit contra conscientiam.

11. Omnis idea pro fundamento & origine & causa habet objecta externa quæ mediantibus sensibus in cerebro sui vestigium relinquunt.

12. Rectissime dicitur à veteribus nihil esse in intellectu quod non prius fuit in sensu i. e. originaliter & causaliter, unde homo sensibus carens omni veritate destituitur.

13. Ideæ commodissime distinguuntur in passivas & activas.

14. Passivæ appellantur quas objecta externa necessariâ quadam actione producunt mediantibus sensoriis in ipsâ mente & dici possunt sensuales.

15. Activæ vocantur illæ, quas ipsa mens ex se libera circa sensuales operatur, has variis rationibus abstrahendo, comparando, subtrahendo.

16. Scientia physices, chymicæ anatomix & medicinæ maximam partem fundatur ideis sensualibus. Mathesis autem pura & metaphysica in activis & intellectualibus maxime est occupata.

17. Ideæ sensuales menti oblatae percipi-

cipiuntur & ad facultatem mentis imaginativam & memoriam spectant, ideæ autem intellectuales concipiuntur & ad intellectum activum purum & iudicium pertinent.

18. Perceptio sola sensualis fallit in iudicando: seu potius voluntas iudicandi ex solis perceptionibus sensualibus & inde concludendo ad ipsam rerum naturam perscrutandam fallit & fallitur.

19. Cum effectus semper distinctum quid sit à causa, hinc perperam à pluribus concluditur, effectus sive certos motus in spiritibus animalibus susceptos & inde dependentes sensationes v. g. caloris, frigoris, doloris, dulcedinis, attractionis existere formaliter & eminent-

nenter in objectis externis tanquam
causis.

20. Mens nostra præter potentiam
passivam percipiendi & activam
concipendi, instructa etiam est faculta-
te fingendi sive imaginante, dum va-
rias de novo producit & componit
occasione sensualem ideas, quæ tamen
non deprehenduntur in re ipsâ.

21. Usus habet hæc fixio in elicien-
da rerum naturalium probabilitate u-
bi sensibus non penetrare possumus, &
ex eo oriuntur hypotheses.

22. Bona hypothesis supposita
debet habere intelligibilia cohærentia
secundò solvi & explicari debent ex in-
de incogniti effectus atque phæno-

mena ut nulla sequatur absurditas.

23. Præcipua regula in inquirenda-
veritate & detegendis erroribus est, ut
quis bene noscat distinguere Ideas fi-
ctas & entia imaginativa ab ideis ve-
ris & entibus intellectus atque con-
ceptus.

24. Omnes ideæ fictæ sunt obscuræ,
nec facile à quovis capi & intelligi pos-
sunt, veræ autem sunt perspicuæ faci-
les & statim concipiuntur.

25. Ideæ, quæ non desumptæ sunt ex
ipsis rebus extra mentem existentibus,
plerumque sunt fictæ.

26. In scientia physica perperam re-
rum naturalium phænomena expli-
cantur ex ideis in mente formatis; cum

potius ipsæ ideæ prius ex rebus naturalibus desumi debeant.

27. Falsum est axioma: in idea certa cujusdam rei in mente formata includi & involvi etiam statim existentiam rei externam.

28. Ubi sensus & intellectus deficit, ibi plerumque homines incipiunt fingere.

29. Cum scientia nostra versetur in ideis claris & evidentibus, ideo opus est, uti vocabulis, quæ idearum in mente existentium figilla esse debent, claris & perspicuis, quæ similem mox producant in mente ideam.

30. Voces obscuræ, quæ non vulgaribus terminis explicari & definiri possunt

sunt, plerumque testantur de ideis fi-
ctis.

31. Origo innumerabilium erro-
rum est, quod quivis secundum arbitri-
um suum vocabulis attribuat certas
notiones.

32. Complures controversiæ statim
deciduntur, & veritas plana & facilis
fit, quando terminis vulgaribus & sim-
plicissimis utimur.

33. Fons errorum innumerabilium
est, quod homo limites intellectus sui
nesciat, sed ultra ipsos promoveresci-
entiam velit.

34. Causa præcipuorum errorum in
physicis & theologicis est existimare il-
las res, quæ mente abstrahi possunt &

distinctæ sunt, esse etiam extra mentem
res seorsim existentes.

35. Error maximus & vulgaris philosophorum est, quod naturam & essentiam corporum penetrare velint; cum nullam substantiam, tam spiritua-
lem quam corpoream cognitam habeamus.

36. Rerum creatarum substantiam, vim & essentiam unum idemque esse statuimus.

37. Optime physicus & medicus procedit, quando consequentias deducit ex iis rebus, quæ sensu & ratione certæ sunt, & per gradus non per saltum composita reducit ad simplicia & principiis propiora.

38. Va-

38. Vana est philosophandi ratio quando Medici Cartesiani allaborant rerum naturalium effectus morborum causas, remedium modum agendi ex magnitudine, figura, situ particularum explicare.

39. Physicus & medicus contentus esse debet, quando effectus naturales per causas proximiores explicat, quamvis omnia constent ex certa magnitudine, figura, situ partium, impossibile tamen est, propter imbecillitatem sensuum & hinc etiam raticionandi defectum penetrare intimam structuram & unionem partium præsertim minimarum.

40. Omnis scientia syllogistica arith-

metica algebraica ratiocinandi & judicandi de rebus, consistit in eo unico; quod sicuti æqualium, ita & inæqualium, una eademque inter se sit ratio & proportio.

THESES SELECTIONES

EX MEDICIS.

I.

ET animus & corpus est subiectum medicinæ: & moralitas ac motus atque aptitudo animi dependet maximam partem à sanguinis circulo.

2. Circulatio sanguinis diversa est ratione temperamentorum, ætatum, habitus corporis, vitæ generis, dispositionis hæreditariæ, regionum, alimenterum.

3. Sin-

3. Singula temperamenta, ætates, habitus corporis, vitæ genera, regiones, alimenta, dispositiones ex semine parentum, habent suas peculiare mores, inclinationes, vitia, virtutes, ingenia & variantratione ipsorum.

4. Qui vult corpus sanum servare & ægrotans restituere, merito philosophus & medicus esse debet.

5. Antiquissimi medici paucis herbis & philosophiæ præceptis utebantur in morborum sanatione.

6. Vitæ & sanitatis unicum fundamentum est liber & æqualis sanguinis & humorum motus per corporis minima.

7. Fundamentum omnium morborum

rum est inæqualis vel impeditus sanguinis & humorum circulus.

8. Principium movens omnium animalium & corporis nostri rectissime juxta Hippocratem deducitur ab aere purissimo five æthere.

9. Seminalis spiritus ex quo animalia oriuntur nihil aliud est, quam subtilissima aëris portio, in qua delineatae sunt ideæ omnium partium istius animalis in quo semen fuit generatum.

10. Cum vita nostra consistat in motu sanguinis, nullus autem motus fieri possit nisi sit proportio inter movens & mobile; Hinc facile concluditur convenientem quantitatem, qualitatem & viarum debitam dispositionem requiri, ut homo sit sanus.

11. Plethora, intemperies five caco-
chymia & obstructio sunt plerumque
causæ antecedentes morborum.

12. Sanguis bonus & satis fluidus, li-
cet sit copiosus, per se raro causa mor-
borum est.

13. Venæsectio præsentissime im-
minuit plethoram, hinc ubi periculum
in mora, adhiberi debet.

14. Largior venæsectionis usus cor-
pora infirmat, ipsa que variis morbis &
epidemicis malis obnoxia reddit.

15. Præstat parciori victu, ac motu
intenfiori, sanguinis quantitatem ex-
cessivam imminuere, quam venæse-
ctione, nisi periculum sit in mora.

16. Causa morborum immediata plerumque est motus spirituum & humorum præternaturalis.

17. Solum acidum & viscidum causam morborum proximam esse, sufficientibus rationum momentis adstrui nequit.

18. Omnes morborum motus febre & spasma maxima ex parte continentur.

19. Omnes motus morborum in bonum instituuntur finem.

20. Febres & spasmi non tantum ab acrimonia sanguinis, verum potissimum à sanguinis stasi & motu ejus impedito nascuntur.

21. Omnis hæmorrhagia profundamento habet impeditum sanguinis motum.

22. Remedia, quæ mensium & hæmorrhoidum obstructionem sanant, uti sunt temperata volatilia, martialia, extracta amara, salina, nitrofa, illa etiam præservant à nimis hæmorrhagiis.

23. Decem ad summum remedia apta sunt, omnis generis morbos internos tuto & feliciter propulsare.

24. Nullum datur remedium, quod solum aptum sit morbum certum sanare.

25. Applicatio remediorum ratione doseos, temporis, ordinis, continuationis.

tionis, genuinum est & esse debet arcanum medicorum.

26. Medicamenta Galenica plus valent in morbis acutis, chymica in chronicis.

27. Qui probe scit motus instituere & illos sedare, ille optimus est medicus.

28. Medicus plus circa motus quam correctionem materiæ operari debet.

